

KHUTBAH KHAS AIDILFITRI 1442H/ 2021M
“AIDILFITRI: KEMBALI KEPADA FITRAH
MENUJU REDA ILAHI”

(13 Mei 2021M/ 01 Syawal 1442H)

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ،

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ،

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ، وَلِلَّهِ الْحَمْدُ.

الْحَمْدُ لِلَّهِ الَّذِي هَدَانَا لِهَذَا وَمَا كُنَّا لِنَهْتَدِيَ لَوْ لَا أَنْ هَدَانَا اللَّهُ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا

عَبْدَهُ وَرَسُولَهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِ

سَيِّدِنَا مُحَمَّدٍ صَلَاةً وَسَلَامًا دَائِمِينَ مُتَلَازِمِينَ إِلَى يَوْمِ الدِّينِ.

أَمَّا بَعْدُ، فَيَا أَيُّهَا الْمُسْلِمُونَ، اتَّقُوا اللَّهَ، أَوْصِيكُمْ وَإِيَّايَ بِتَقْوَى اللَّهِ،

فَقَدْ فَازَ الْمُتَّقُونَ.

Muslimin dan muslimat yang dirahmati Allah!

Marilah sama-sama kita memperkukuh takwa kepada Allah *subhanahu wata'ala* setelah sebulan kita menjalani ibadah puasa di bulan Ramadhan. Maka pada hari ini marilah kita meningkatkan kesyukuran kepada Allah *subhanahu wata'ala* sebagai tanda kegembiraan serta kemenangan selepas menghadapi cabaran ketika Ramadhan. Justeru marilah sama-sama kita menghayati khutbah yang bertajuk “***Aidilfitri: Kembali Kepada Fitrah Menuju Reda Ilahi.***”

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ، وَلِلَّهِ الْحَمْدُ

Muslimin dan muslimat yang dirahmati Allah!

Hari ini adalah hari yang dinanti-nantikan oleh umat Islam sebagai hari untuk bergembira. Kegembiraan umat Islam bukanlah kegembiraan yang biasa dan bukan yang sia-sia, tetapi kegembiraan yang disertai dengan rasa syukur dan didahului dengan membesarkan Allah *subhanahu wata'ala*, melalui alunan takbir yang dilaungkan bermula dari masuknya waktu Maghrib semalam dan berakhir sebelum solat sunat Aidilfitri sebentar tadi. Firman Allah *subhanahu wata'ala* di dalam surah al-Baqarah, ayat 185:

... وَلِتُكَبِّرُوا اللَّهَ عَلَىٰ مَا هَدَاكُمْ وَلَعَلَّكُمْ تَشْكُرُونَ

Maksudnya : ... dan supaya kamu membesarkan Allah kerana mendapat petunjukNya, dan supaya kamu bersyukur.

Muslimin dan muslimat yang dirahmati Allah!

Kemeriahan dan kegembiraan menyambut Aidilfitri yang kita rasai hendaklah dikongsi bersama dengan umat Islam yang lain. Janganlah lupa kepada golongan yang susah, uzur, fakir, miskin dan anak-anak yatim dan sebagainya. Hurlurkanlah bantuan dan sumbangan kepada mereka kerana mereka juga berhak untuk menikmati kegembiraan dan kemeriahan menyambut hari raya yang mulia ini.

Alhamdulillah, ketika Ramadan pada tahun ini selain berpuasa, kita dapat ke masjid dan surau untuk beribadah walaupun ketika masih

berhadapan dengan pandemik COVID-19 dengan mematuhi garis panduan yang telah disediakan oleh pihak berwajib. Semoga usaha kita menggapai taqwa ketika Ramadan itu dapat kita teruskan dalam kehidupan kita pada bulan-bulan yang lain.

Marilah kita sama-sama menginsafi apa yang berlaku di dunia pada masa ini adalah sebagai teguran daripada Allah *subhanahu wata'ala* supaya kita dapat menilai kembali, iman, amal dan akhlak kita. Terbukti dan amat nyata sekali melalui penularan koronavirus di seluruh dunia ini, hebatnya kekuasaan dan keagungan Allah *subhanahu wata'ala*. Justeru, seluruh kehidupan kita hendaklah diserahkan kepada Allah selepas kita berusaha dalam kadar kemampuan kita sebagai makhluk-Nya. Lakukan sebanyak-banyak amal soleh dan tinggalkan segala dosa dan mungkar serta bertaubatlah kepada-Nya dengan sebenar-benar taubat.

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ، وَلِلَّهِ الْحَمْدُ

Muslimin dan muslimat yang dirahmati Allah!

Pada hari mulia ini, rebutlah peluang untuk mengeratkan lagi hubungan silaturrahim dan persaudaraan Islam dengan doa dan ucapan serta saling bermaafan antara satu sama lain.

Manfaatkanlah kecanggihan teknologi komunikasi pada masa kini untuk saling berhubung antara satu sama lain terutamanya dalam keadaan negara kita sedang berusaha memutuskan rantai wabak penyakit yang disebabkan oleh virus COVID-19.

Sesungguhnya, tuntutan menjaga keselamatan diri dan kesihatan

itu adalah salah satu daripada Maqasidus Syariah atau Matlamat Syariah itu diturunkan iaitu memelihara nyawa. Sebagaimana ibadah puasa mendidik kita ke arah yang lebih baik dengan bersabar daripada melakukan segala perkara yang boleh membatakannya, maka seumpama itulah juga kita bersabar mematuhi segala peraturan yang ditetapkan bagi membebaskan negara kita daripada wabak penyakit yang berbahaya ini.

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ، وَلِلَّهِ الْحَمْدُ

Para jemaah yang dirahmati Allah,

Mengakhiri khutbah Aidilfitri ini, marilah kita mengambil beberapa intipati dari khutbah ini sebagai panduan hidup kita:

Pertama: Kita hendaklah mensyukuri Aidilfitri sebagai nikmat daripada Allah kepada hambanya yang beriman yang telah selesai melaksanakan kewajipan ibadah puasa.

Kedua: Kita hendaklah menghayati Aidilfitri dengan penuh kesyukuran dan ketaatan kepada segala syariat dan perintah Allah.

Ketiga: Kita hendaklah menginsafi apa yang berlaku di dunia ini sebagai teguran daripada Allah supaya kita tingkatkan iman, amal soleh, akhlak dan bertaubat kepadaNya.

Keempat: Kita hendaklah sentiasa memperkukuhkan hubungan silaturrahim dan persaudaraan Islam melalui pelbagai cara.

Kelima: Kita hendaklah menjaga keselamatan daripada segala perkara yang boleh memudarat dan membahayakan keselamatan

diri, keluarga dan masyarakat.

Marilah kita bersama-sama menghayati firman Allah *subhanahu wata'ala* di dalam Surah al-Ahqaf, ayat 13-14 :

أَعُوذُ بِاللَّهِ مِنَ الشَّيْطَانِ الرَّجِيمِ. بِسْمِ اللَّهِ الرَّحْمَنِ الرَّحِيمِ.
إِنَّ الَّذِينَ قَالُوا رَبُّنَا اللَّهُ ثُمَّ اسْتَقَمُوا فَلَا خَوْفٌ عَلَيْهِمْ وَلَا هُمْ يَحْزَنُونَ ﴿١٣﴾
أُولَئِكَ أَصْحَابُ الْجَنَّةِ خَالِدِينَ فِيهَا جَزَاءً بِمَا كَانُوا يَعْمَلُونَ ﴿١٤﴾

Maksudnya : Sesungguhnya orang yang menegaskan keyakinannya dengan berkata: "Tuhan kami ialah Allah", kemudian mereka tetap teguh di atas jalan yang betul (dengan pengakuan iman dan tauhidnya itu), maka tidak ada kebimbangan (dari sesuatu yang tidak baik) terhadap mereka, dan mereka pula tidak akan berdukacita. Merekalah ahli syurga, tetap kekalah mereka di dalamnya, sebagai balasan bagi amal-amal soleh yang mereka telah kerjakan.

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ
الْعَلِيمُ. أَقُولُ قَوْلِي هَذَا، وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ
الْمُسْلِمِينَ وَالْمُسْلِمَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.
اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ، لَا إِلَهَ إِلَّا اللَّهُ وَاللَّهُ أَكْبَرُ، اللَّهُ أَكْبَرُ
وَاللَّهُ الْحَمْدُ.

KHUTBAH KEDUA IDILFITRI

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ،
اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ، وَلِلَّهِ الْحَمْدُ.
الْحَمْدُ لِلَّهِ حَمْدًا كَثِيرًا كَمَا أَمَرَ، أَشْهَدُ أَنْ لَا إِلَهَ إِلَّا اللَّهُ وَحْدَهُ لَا
شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ. اللَّهُمَّ صَلِّ وَسَلِّمْ
عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ، أُوصِيكُمْ وَإِيَّايَ بِتَقْوَى اللَّهِ، فَقَدْ
فَارَ الْمُتَّقُونَ.

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ، وَلِلَّهِ الْحَمْدُ

Kaum muslimin dan muslimat yang dirahmati Allah,

Sesungguhnya, sambutan hari raya dalam Islam adalah ibadah. Maka kita hendaklah berusaha supaya kegembiraan dalam berhari raya tidak sesekali bercampur-aduk dengan perkara-perkara berbentuk maksiat dan pembaziran.

Dalam bergembira merayakan Idulfitri, marilah kita bersama-sama meneruskan semangat Ramadan yang tertanam di jiwa dengan melaksanakan puasa sunat enam hari di bulan Syawal sebagaimana yang digalakkan kepada kita untuk melakukannya. Sabda Rasulullah *sallallahu 'alaihi wasallam* yang berbunyi :

((مَنْ صَامَ رَمَضَانَ ثُمَّ أَتْبَعَهُ بِسِتٍّ مِنْ شَوَّالٍ كَانَ كَصِيَامِ الدَّهْرِ))

Maksudnya : Sesiapa yang berpuasa Ramadan, dan diikuti dengan enam hari di bulan Syawal, maka ia seumpama berpuasa sepanjang tahun.

(Hadis riwayat Imam Muslim)

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ. يَا أَيُّهَا الَّذِينَ آمَنُوا صَلُّوا عَلَيْهِ وَسَلِّمُوا تَسْلِيمًا. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ أَجْمَعِينَ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ. إِنَّكَ سَمِيعٌ قَرِيبٌ مُجِيبُ الدَّعَوَاتِ وَيَا قَاضِيَ الْحَاجَاتِ.

Ya Allah, ampunkanlah dosa dan kesalahan semua kaum Muslimin dan Muslimat sama ada yang masih hidup mahupun yang telah meninggal dunia. Ya Allah ampunkanlah secara khususnya dosa-dosa dan kesalahan ibubapa kami, saudara-mara kami, sahabat handai kami, guru-guru kami dan orang yang menyayangi kami keranaMu ya Allah. Limpahkanlah kesejahteraan, kedamaian dan kebahagiaan kepada mereka dalam kehidupan di dunia ini lebih-lebih lagi di akhirat kelak Ya Allah.

Ya Allah, berikanlah taufiq dan hidayahmu kepada kami semua, kepada pimpinan-pimpinan Islam negara kami khususnya Seri Paduka Baginda Yang Dipertuan Agong Malaysia dan juga pimpinan-pimpinan Islam negeri kami khususnya kepada Tuan

Yang Terutama Yang Dipertua Negeri Sarawak.

Ya Allah, Ya Dzal Jalali Wal Ikram! Kabulkanlah doa kami, Terimalah solat kami, puasa kami, amalan-amalan sunat yang telah kami kerjakan sepanjang bulan Ramadhan Al-Mubarak, kekhusyukan kami, perhambaan kami dan sempurnakanlah segala kekurangan yang ada pada diri kami. Perkuuhkanlah perpaduan antara kami dan umat Islam seluruhnya Ya Allah, Ya Akramal Akramin.

عِبَادَ اللَّهِ. إِنَّ اللَّهَ يَأْمُرُ بِالْعَدْلِ وَالْإِحْسَانِ، وَإِيتَاءِ ذِي الْقُرْبَىٰ وَيَنْهَىٰ
عَنِ الْفَحْشَاءِ وَالْمُنْكَرِ وَالْبَغْيِ، يَعِظُكُمْ لَعَلَّكُمْ تَذَكَّرُونَ. فَادْكُرُوا اللَّهَ
الْعَظِيمَ يَذْكُرْكُمْ، وَاشْكُرُوهُ عَلَىٰ نِعْمِهِ يَزِدْكُمْ، وَاسْأَلُوهُ مِنْ فَضْلِهِ
يُعْطِكُمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.
اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ، لَا إِلَهَ إِلَّا اللَّهُ وَاللَّهُ أَكْبَرُ، اللَّهُ أَكْبَرُ
وَاللَّهُ الْحَمْدُ.

تَقَبَّلَ اللَّهُ مِنَّا وَمِنْكُمْ صَالِحَ الْأَعْمَالِ. مِنَ الْعَائِدِينَ وَالْفَائِزِينَ، وَكُلِّ
عَامٍ وَأَنْتُمْ بِخَيْرٍ.